

Arnat naartusut erninissaannut sapaatip akunneri sisamaannangortut tagginneqarneraniit naartunermiinnut atatillugu sulinngiffeqartalernissaat pillugu Naartunermi, erninermi meeravissiarternermilu sulinngiffeqartarneq ullormusiaqartarnerlu pillugit Inatsisartut inatsisaata nr. 14-p, 7. december 2009-imeersup allannguutissaanik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut (*Inatsisartunut ilaasortamit Randi Vestergaard Evaldsenimit, Demokratit, saqqummiunneqartoq*)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneernejarneranut

ILASSUTITUT ISUMALIUTISSIISSUTAA

Ataatsimiititaliap suliarinninnermini kingullermik makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Nivi Olsen, Demokratit
Inatsisartunut ilaasortaq Malene Vahl Rasmussen, Demokratit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelsen, Inuit Ataqtigiit

Ulloq 9 maj 2019-imi aappassaaneerinninnerup unitsinneqarnerata aammalu siunnersuutip ataatsimiititaliamut innersuuteqqinneqarnerata kingorna pissutsit innersuusseqqinnermut pissutaasut ataatsimiititaliamit qitiutillugit sammeneqarput.

1. Siunnersuutip Inatsisartunit aappassaaneernejarnera

Ataatsimiititaliap ulloq 3. maj 2019-imi isumaliutissiissutaani allassimasutut naartunermut, erninermut meeravissiarternemullu atatillugu sulinngiffeqartarneq pillugu Inatsisartut inatsisaat nutaaq ulloq 10. april 2019-imi Naalakkersuisunit tusarniaassutitut nassiuunneqarpoq. Aalajangiiffigisassatut siunnersuummik UKA 2018/106-imik Inatsisartut akuersinerannut atatillugu Naalakkersuisunut suliakkiutigineqartut siunnersuutip ilaatigut imarai. Taamaalillutillu inatsisip atuuttup allanngortinneqarnissaanut allannguutissatut

siunnersuummik suliaqarnissamut Naalakkersuisut peqquneqarnissaat Inatsisartut UKA 2018-imi akuersissutigaa, taamaaliornikkut angajoqqaat sulinngiffeqartarnerat sapaatit akunnerinik sisamanik sivitsorneqassalluni. Allanguut 1. januar 2020-mi atuutilersussaavoq.

Siunnersuutip matuma aappassaaneernejarneranut atatillugu Naalakkersuisut akissuteqaamminni ima paasissutissiipput:

”Naartunermi, erninermi meeravissiartaarnermilu sulinngiffeqartarnej pillugu Inatsisartut inatsisissaattut siunnersuut tamatuma kingorna siunnersuutitut ataatsimoortut saqqummiunneqarsinnaassaaq, tamatumanilu tusarniaatitsineq nutaaq ingerlanneqareerpat ilanngutassat tamarmiusut ilanngullugit siunnersuutigineqartut UPA 2020-mi saqqummiunneqarsinnaalluni.”

(Ataatsimiititaliap erseqqissunngortitsinera)

Taama kinguartoornissamik Naalakkersuisut ilimasaaruteqarnerat pissutigalugu siunnersuutip matuma ataatsimiititaliamit nutaamik suliarineqartussanngorlugu innersuuteqqinneqarnissaa Inatsisartunit aalajangiunneqarpoq.

2. Naalakkersuisunit saaffiginnissut

Suliap kinguartinneqarnera siuliani taaneqartoq pillugu Peqqissutsimut, Isumaginninnermut Inatsisinillu Atortitsinermut Naalakkersuisumit allakkatigut saaffiginnissummik ataatsimiititaliaq ulloq 13. maj 2019-imi tigusaqarpoq. Saaffiginnissut ilassutitut isumaliutissiisummut matumunnga **ilanngussaq 1-itut** ilanngunneqarpoq matumalu kinguliani sammineqarluni.

3. Ataatsimiititaliap siunnersuummik suliarinninnera

Naalakkersuisut ataatsimiititaliamut saaffiginnissutaannit ataatsimiititaliamut qinnuiginninneq imaattoq allassimavoq:

”Taamaattumik Naalakkersuisuninngaanniit maannakkut ataatsimiititaliaq akuerseqquneqartussaavoq Inatsisartut UKA 2018/106-imi aalajangiiffigisaata atuutsilernissaa UPA 2020-mi Naartunermut, erninermut meeravissiartaarnermullu Inatsisartut inatsisissaattut siunnersuummut peqataatillugu eqqartorneqaqqaarnissaannut utaqqitinneqarsinnaanersoq.”

Tamanna pillugu ataatsimiititaliap naatsumik oqaatigissavaa Inatsisartut aalajangiinerannik (matumani ilaannakortumik) saneqqutsinissap akuerinissaanut ataatsimiititaliaq pisinnaatitaangimmat.

Naalackersuisut saaffiginnissumminni nangillutik allapput:

”Ataatsimiititaliaminngaanniit Inatsisartut UKA 2018/106-imi aalajangiiffigisaat UPA 2020-mut kinguartinneqarnissaa akuerineqarsinnaanngippat taava Naalackersuisuninngaanniit Naartunermi, erninermi meeravissiartaarnermilu sulinngiffeqartarnej ullormusiaqartarnerlu pillugit Inatsisartut inatsisaat nr. 14, 7. december 2009-imi allannguinnissamut siunnersuusiussapput, tassanilu ernereernerup kingorna sulinngiffeqarnissamik sivitsuiniarneq kisimi pineqassalluni. Maannakkut Inatsisartut inatsisissaattut siunnersuummi maannakkut tusarniaassutigineqartumi sulinngiffeqarnerup sapaatip akunnerinik sisamanik sivitsuutaa UKA 2018/106-imi aalajangiussaasumut sanilliullugu eqaannerusumik atorineqarsinnaaneranut siunnersuutitaqarpoq, taamaattumillu meerartaareernermi sulinngiffeqarnissamut aalajangersakkat UPA 2020-mi allanngornissaannut siunnersuuteqartoqariissalluni.”

(Ataatsimiititaliap erseqqissunngortitsinera)

Siuliani allassimasut ataatsimiititaliamit ima paasineqarput:

1. UKA 2018/106 naapertorlugu angajoqqaat sulinngiffeqartarnerisa sivitsorneqarnissaanik suliakkiunneqartoq Naalackersuisunit suli piviusunngortinniarneqartoq.
2. UKA 2019-imi inatsimmut allannguutissatut siunnersuummik saqqummiussinikkut UKA 2018/106-imi angajoqqaat sulinngiffeqartarnerisa sivitsorneqarnissaa pillugu piffissaliunneqartoq Naalackersuisunit eqquutsinniarneqalersaartoq.
3. UPA 2019/53 maanna ilusimisut iluseqartoq akuersissutigineqassappat ilaqutariinnut tunngasumik naalackersuinikkut iliuusissat inatsisissatut siunnersuummi, maanna tusarniutigineqartumi, Naalackersuisut *namminneerlutik suliniutigisaat* Naalackersuisunit kinguartinneqalersaattut. Taarsiullugu iliuusissat taakku inatsisissatut siunnersuutikkut¹, UPA 2019/53-imik ilanngullugu piviusunngortitsisumik, Inatsisartunut UPA 2020-mi saqqummiunneqassasut.

4. Siunnersuutip aningaasatigut kingunerisassai

Naalackersuisut assigalugit ataatsimiititaliamit oqaatigineqassaaq siuliani taaneqartutut ingerlatsinerup kingunerissammagu UKA 2018/106-imut, UPA 2019/53-imut kiisalu Naalackersuisut namminneq suliniutigisaannut tunngasumik suliaqarneq Naalackersuisuni

¹ Erseqqissumik allassimangilaq inatsimmut allannguutissatut siunnersuut imaluunniit inatsisissamut pingaarnermut nutaamut siunnersuut pineqarnerisooq, ataatsimiititaliamilli ilimagineqarpoq kingullertut taasaq pineqartoq.

taamatullu Inatsisartuni allaffissornikkut annertunerusumik pisariaqartitsilerneq, tassa inatsisissatut siunnersuut ataasiinnaq pinnagu marlunnilli suliaqarnissaq, tusarniaanissaq, suliarinninnissaq aammalu piviusunngortitsinissaq pisariaqassammat.

Tamatuma saniatigut siunnersuummut matumunnga ataatsimiititaliap 3. maj 2019-imi isumaliutissiissutaa ataatsimiititaliamit innersuussutigineqassaaq.

5. Ataatsimiititaliap inassuteqaatai

UKA2018/106-imut siunnersuummut suliaq aallartinneqartoq piviusunngortinneqarnissaa ingerlaannassasoq ataatsimiititaliamit maluginiarneqarpoq, taamaaliornikkut UKA 2019-imut siunnersuummik ulloq 1. januar 2020-imi atuutilersussamik saqqummiussisoqarsinnaaqqullugu.


UPA 2019/53-imut siunnersuut ilusimisut iluseqartoq akuerineqassappat, kingusinnerpaamik UPA 2020-imi siunnersuutip piaartumik atuutilersussap piviusunngortinneqarnissaanut siunnersuummik saqqummiussisoqassaaq.

Taama oqaaseqarluni siunnersuutip ilusimisut iluseqartillugu akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisumilu allassimasunut paasinnilluni ataatsimiititaliap siunnersuut aappassaaniigassanngortippaa.



Stine Egede
Siulittaasup tullia




Laura Táunâjik
Siulittaasoq




Karl-Kristian Kruse



Malene Vahl Rasmussen



Mikivuk Thomassen



Aqqa Samuelsen